



Huldricus Zasius natus est Constantiæ Anno 1461. Hic cum præstanti ingenio esset præditus, literis operam dedit, & liberales artes facile percepit. erat insuper rara prudētia & naturali eloquentia insignis. Itaq; primò Constantiensis Consistorij notarius factus est. Eam functionem cum dextre expediret, Archigrammateus Friburgensis reipublicæ constituitur. Cum autem uideret scribas sine iuris cognitiōe infeliciter in hominum actionibus uersari, anno demum 1491 iuri operam dare cœpit, sub Ioāne Cnapo, & Paulo de Citadinis Patauino professoribus Friburgēsisibus. In eo studio cum magna diligentia uersaretur, euasit tandem in Germania suo tempore tantus, quantus uix ullus alius in Italia, id quod hodie scripta eius luridica testantur, etiam ab Italis, parcis alioqui ultramontanorum (ut illi uocant) laudatoribus, in summo precio haberi solita. Magna fuit ei cum Erasmo Roterodamo familiaritas, id quod ex eorum epistolis patet. Cum itaq; talis esset, Friburgi iuris professioni præficitur: quam etiam functionem tanta dignitate & eruditione absoluit, ut illud gymnasium plurimum exornarit. Erat etiam uitæ integerrimæ, nisi quod ultimis annis uini auuidior fuisse dicitur: quanquam & id senectæ condonandum. Vixit enim annos septuagintaquatuor. Tandem anno 1535, octauo calend. Decemb. professionem cum uita finiuit, & in primario templo honorificè sepultus fuit. Reliquit is præclaros aliquot filios, inter quos & D. Huldricus Zasius uir Iurisconsultissimus, qui ob rerum usum ad Cæsarum curiam uocatus, res maximas administrat, & etiamnum hac luce fruitor. Vt autem Friburgēsis magistratus sese Huldrico defuncto gratum declararet, in primario templo in marmore ad monumētum eius hæc uerba inscribi iussit.